

هوا شمالي بيسقّع التماسيل. فتّ ع الكابلا، إجريّ دفيانين وخيالي بارد.

- شو قصّبتك بتضلّي محيّرًا قلّي البنك.

- طالع عبالى كون غير مطرح. ما عندي شي قولو ليسوع.

- تطلّعي بالقربان متل ألبيرتا، بيدفا خيالِك.

سمعت من البنك وحطّيت وجّي بيت القربان متل فيرجيليا مبارح وألبيرتا اليوم. وصرت إتخايل وإنظر يسوع يطلّ من باب السكرستيا، ويجي يرّكع حدّي ويسألني:

- كيفك يا ميريام؟

- مش مليحا.

- كيف ندرِك، نشالله أخذ عليكى؟

- مش شايفو دبلان وعم يصفرّ متل الزهرا المحرومي من دفا الشمس. من وقت اللّي ندرتلك، وأنا ناظرا تجي وتحطّ إيدك ع قلبي ت تنضّفو من كل شي ما بيشبهلك.

- جيت لعندك أكثر من مرّا، وكل مرّا شوفك مشغولي بغيري.

- كنت تجي ع الباردا.

- متل ما إنتي جيتي لعندي ع الباردا.

- وين كنت ما شعلت نارك فيّي. وكم مرّا تنهدتلك تعا، ندري رح يسقّع، ليش ما جيت؟

- يومتا كنت رح إجي لو ما شوف الشيطان سبقتني، بدك تساعديني ع الشيطان.

- أنا!

- أنا وحدي ما فيّ عليه . بدّك تساعديني .

- إنت وحدك اللي بتقدر .

- بقدر ساعدك وقت الإنتي بدّك تشحطيه .

ولمّن ما عاد فيّ إتخايل . وإسأل وجاوب ، ومرّات إخترع جواب ما إلو سؤال . صرخت ع الواطي ،
وينك . تعات قلّك أنّك صعب أكثر من خلق اللوحا . بدّي كل يوم إخلقك فيّ من جديد وإرسمك ع
دقّة قلبي متل ما برسم ع القماشي . وضل إخلقك . إندهك وردّ عنك ، إسألّك وجاوب أنا ، وحبّك وقول
إنّك بتحبّني ، وإنّو حبّي نواصا زغيري وحبّك الشمس العم تدفيّ العالم .